

ЎЗБЕК ТИЛИДА КАСАЛЛИК НОМЛАРИНИНГ ДИСФЕМИЗАЦИЯСИ**Абдурахманова Мадина Улугбековна**

Андижон давлат тиббиёт институти

<https://doi.org/10.5281/zenodo.7336405>

Аннотация. Ушбу мақолада ўзбек тилида касаллик номларининг дисфемизацияси тадқиқ қилинмоқда. Шунингдек, мақолада нима учун одамлар орасида авваллари одобсизлик, уят, табу хисобланган ифодалардан фойдаланиш даражаси кенгайганлиги тўғрисида ҳам фикрлар ёритилган.

Калит сўзлар: дисфемизм, дисфемизация, касаллик, касаллик номи, атама.

ДИСФЕМИЗАЦИЯ НАЗВАНИЙ БОЛЕЗНЕЙ В УЗБЕКСКОМ ЯЗЫКЕ

Аннотация. В данной статье исследуется дисфемизация названий болезней в узбекском языке. Также в статье рассматривается, почему вырос уровень употребления в народе выражений, ранее считавшихся непристойными, постыдными и табуированными.

Ключевые слова: дисфемизм, дисфемизация, болезнь, название болезни, термин.

DYSPHEMISATION OF DISEASE NAMES IN THE UZBEK LANGUAGE

Abstract. In this article, dysphemisation of disease names in the Uzbek language is studied. The article also discusses why the level of usage of expressions that were previously considered obscene, shameful, and taboo among people has increased.

Keywords: dysphemism, dysphemisation, disease, disease name, term.

КИРИШ

Аввало, дисфемизация атамасига таъриф берсак. Дисфемизация (қадимги юнонча δυσφήμι «баднуклилик, ёмон сўзларни ишлатиш») салбий семантик тус бериш ёки нукнинг ифодалилигини ошириш учун дастлаб нейтрал бўлган тушунчанинг кўпол ёки одобсиз шаклидан фойдаланиш, масалан: *кет ўрнига даф бўл*, *юз ўрнига башара*, *бош ўрнига калла* каби.

Ўзбекистон Республикаси умумий ўрта таълим мактаблари учун 2020 йилда чоп этилган 11 синф дарслигида дисфемизмга қуйидагича таъриф берилган: дисфемизм (грек тилида бу сўз «кўпол гапирмоқ» маъносида қўлланган) дейилади. Масалан, ёмон бўлибди тушунчаси учун қўлланган *расво бўлибди*, *касал* тушунчаси учун қўлланган *дард урибди* ифодалари дисфемизмга мисол. Нутқда дисфемизмни кўп қўллаш кишининг маданиятсиз эканини кўрсатади [1].

ТАДҚИҚОТ МАТЕРИАЛЛАРИ ВА МЕТОДОЛОГИЯСИ

Она тили қомусида дисфемизмга қуйидагича таъриф берилган: Дисфемизм нарса ва ходисаларни ўз номи билан эмас, балки бошқа бир кўполроқ сўз ёки сўз бирикмаси, ибора билан аташ ҳолларининг учрашидир. Масалан, инсонга нисбатан ишлатиладиган ўлмоқ сўзи ўрнида *жойи жаҳаннамдан бўлди*, *асфалософилинга равона бўлди* иборалари, *ҳомиладор* сўзи ўрнида *бўғоз* сўзларини ишлатиш ҳоллари ҳам учраб туради. Сўз ёки сўз бирикмаси, ибора бундай кўпол маънода қўлланганда дисфемизм дейилади. Дисфемизм грекча дисфемисмо сўзидан олинган бўлиб, “кўпол ифода” деган маънони билдиради ва эвфемизмга зид туради. Дисфемизмлар сўзлашувда маданий савияси паст кишилар нутқида учрайди. Бадиий асарларда, одатда, салбий феъл-атворли кишилар нутқида кўзга ташланади [2].

Х.Қодированинг таъкидлашича дисфемизм иккинчи жаҳон урушидан кейингина турли иллатлар (гиёҳвандлик, фоҳишабозлик, ўғрилиқ, етимлик) авж олгач, эвфемик бирликлар қаторида нутқ сатҳида етарли даражада ўз ўрнига эга бўла бошлаган ва тилшунослик тадқиқ манбаига айланган [3].

XXI аср техника-технология, ахборот алмашинишнинг жадаллашуви, барча соҳалардаги глобаллашув ва сўз эркинлиги тамойилларининг ривожланиши билан ажралиб туради. Сўз эркинлиги бутун дунёда айнан мана шу асрда олдинги асрларга қараганда қатъий ўрнини эгаллади. Бунинг натижаси ўлароқ, авваллари одобсизлик ҳисобланган, уят ҳисобланган, табу ҳисобланган ифодалардан фойдаланиш даражаси кенгайди. Айниқса, бу ҳолат ҳозирги давр ёшлари орасида анча урф олган. Бунинг сабаблари сифатида интернет тармоқлари орқали бемалол дунёнинг ҳоҳлаган қисмидаги инсонларнинг бир-бири билан мулоқот қила олишлари, фикр алмашина олишлари ва бунинг натижасидаги бошқа менталитетга хос одатларни ўзлаштиришнинг тезлашганлигини мисол қилиб келтиришимиз мумкин.

Ўзбек тилшунослигида дисфемизмлар тилнинг алоҳида ифода бирлиги сифатида ўрганилмаган. Бу ходисанинг кам ўрганилганлигига сабаб қилиб маданий мулоқотни амалга оширишда кўпол сўзларнинг ишлатилиши мумкин эмаслиги, бадий асарларда одоб нуқтаи назаридан бундай ифодаларнинг қўлланилиши тўғри келмаслиги каби ҳолатларни айта оламиз.

Юқорида айтиб ўтганимиздай ўзбек тилшунослигида дисфемик ифодаларнинг тадқиқи алоҳида ўрганиш объекти бўлмаган. Дисфемизм ҳақида олиб борилган илмий ишлар сифатида Х.Б.Қодированинг “Абдулла Қодирийнинг эвфемизм ва дисфемиздан фойдаланиш маҳорати” [4] номли номзодлик диссертациясини, шунингдек, “Ўзбек тилида эвфемизм ва дисфемизм” [5] номли ўқув қўлланмаларини санаб ўтишимиз мумкин.

ТАДҚИҚОТ НАТИЖАЛАРИ

Демак, дисфемик бирликлар айтиш ва ишлатиш мумкин бўлмаган тил бирликлари, яъни табулардир. Масалан, *чаён* сўзи тилга олинмайди. Бу ўзбек тилига хос. Чунки уни аташ чакириш маъносини беради, деб тушунилади. Маълумки, бу ҳашарот захарли бўлиб, захари ниҳоятда ўткир. У чакса, қаттиқ азоб беради. Шунинг учун унинг номи ўзбекларда тақиқ қилинган. Яъни, *чаён* сўзини тилга олмасликнинг ўзи табу деб қаралади. Шунга ўхшаш яна *қуйдирғи* сўзи ҳам ўзбек иримига кўра тилга олинмайди. Чунки бу номдаги яра ҳам ўз ўтиш кечимига кўра ниҳоятда даҳшатли бўлиб, ўлимга олиб боради. Шу кунда яна *рак* сўзи тилга олинмайдиган бўлди. Унинг ҳам давосиз касаллик экани шунга сабаб ҳисобланади. Буларнинг ҳаммаси иримга кўра табу қилинган [6].

Кўриб турганимиздай, дисфемизмлар одоб-ахлоқ меъёрларига тўғри келмайдиган, тингловчини кўнглини оғритиб қўйиши мумкин бўлган тил бирликлари экан. Ушбу мақолада касаллик номлари устида тадқиқот олиб бораётганлигимизни инобатга олсак, касаллик номлари тингловчи ва сўзловчи учун бироз ёқимсиз ва ноқулай ҳиссиётларни вужудга келишини инобатга олишимиз даркор. Одатда бундай тил бирликлари эвфемизация қилишни тақазо этади, аммо, бадий асарларда ва оғзаки нутқда, ҳаттоки касаллик ҳолатларини ҳам янада салбий тусга бўяб, дисфемик қўллаш ҳолатлари учраб туради. Масалан, жуда озгин инсонга нисбатан *қилтомоқ* атамасини қўллаш, бирор нарсани топа олмаётган инсонга нисбатан *қўр* атамасини қўллаш, ранги “синик” одамга

нисбатан *сил* атамасини қўллаш, жаҳли тез инсонга нисбатан *тутқаноги бор* деган иборани қўллаш, йўталаётган инсонга нисбатан *кўкйўтал* атамасини қўллаш, *жинни, аҳмоқ, довдир* деган касаллик номларини оддий, кундалик сўзлардек қўллаш ва ҳ.к. мисол қилишимиз мумкин.

МУҲОКАМА

Шунингдек, баддий асарларда ҳам касаллик номларининг дисфемизмга учрашини кўришимиз мумкин:

1- мисол. *«Булбулигўё»нинг кўзи ағанаб ётган сопол обдастага тушиди. Обдастанинг жўмраги синган эди. У жаҳли чиқиб обдастани жойига қўйди-да, индамасдан қайтиб кетди ва ош сузар экан, дўнғиллар эди: «Худо кўтарсин, шабкўр... ўлимтик!..» [7]*

А.Қаҳҳорнинг “Сароб” романидан келтирилган ушбу парчада “Худо кўтарсин, шабкўр... ўлимтик!..” жумласида кўзи яхши кўрмайдиган қаҳрамонга нисбатан, аниқроғи унинг заиф томонига танқидий, ҳақоратомуз муносабат ифодаланмоқда, дисфемик ифодалар, *шабкўр... ўлимтик* қўлланилмоқда.

2- мисол. *Шоикром ўн кунча илгари ишга кетаётиб бирров кириб укасидан ҳол сўраган эди. Ўшанда Шонеъматнинг қоқсуяк бўлиб қолганини, катта-катта кўзлари нимагадир чуқур маъно билан ўзига тикилганини кўрган эди [8].*

Ўткир Ҳошимовнинг “Урушнинг сўнгги қурбони” ҳикоясидаги ушбу парчада *сил* касаллигига чалинган Шонеъматнинг ҳолати “*қоқсуяк бўлиб қолган*” ибораси орқали дисфемик ифодаланаётганлигини кўришимиз мумкин.

3- мисол. *Ҳакимжон сўфига тикилди. Бурунги сўфидан, яқиндагина келиб бир ҳафта ётиб кетган сўфидан асар йўқ. Унинг ранги, мачитнинг жайдари шамидек, сап-сарик... гўё касалдан яқиндагина бош кўтарган [9].*

А.Чўлпоннинг “Кеча ва кундуз”идан келтирилган ушбу парчадаги “*Унинг ранги, мачитнинг жайдари шамидек, сап-сарик... гўё касалдан яқиндагина бош кўтарган.*” ибораси орқали қаҳрамоннинг кўриниши дисфемик тарзда ифоданаётганлигини кўришимиз мумкин.

ХУЛОСА

Хулоса ўрнида айтишимиз мумкинки, дисфемизм тушунчаси тилда қўпол шаклда ифодаланадиган сўз ва иборалардир. Касаллик номларининг дисфемизмлари сўзловчининг тингловчига нисбатан масхара, истехзоли, илтифотсиз қарашини, муносабатини ифодалаш мақсадида, ҳамда касаллик ҳолатини янада салбийроқ таърифлашда қўлланади.

REFERENCES

1. В. Mengliyev va b. Ona tili. 2-qism. Umumiy o'rta ta'lim maktablarining 11-sinfi uchun darslik. – T.: O'qituvchi, 2020. – 96 b. – B. 34.
2. Mengliyev V., Xoliyorov O'. Ona tili. Qomus. – T., 2009. – 270 b. – B. 35.
3. Қодирова Х.Б. Ўзбек тилида эвфемизм ва дисфемизм//Ўқув услубий қўлланма. Тошкент, 2013. – 48 б. – Б. 32.
4. Қодирова Х.Б. Абдулла Қодирийнинг эвфемизм ва дисфемиздан фойдаланиш маҳорати: Фил. фан. номз. дис. автореф. – Т., 2012. – 26 б.
5. Қодирова Х.Б. Ўзбек тилида эвфемизм ва дисфемизм// Ўқув услубий қўлланма. – Тошкент, 2013.
6. Миртожиев М.М. Ўзбек тили семасиологияси. – Тошкент: “Mumtoz so‘z”, 2010. – 288 б. – Б. 121.
7. А.Қаҳҳор. Асарлар . Беш жилдлик. Биринчи жилд. Сароб. Роман. Ҳикоялар. – Т.: Гафур Гулом номидаги адабиёт ва санъат нашриёти, 1987. – 336 б. – Б. 224
8. Ўткир Ҳошимов. Урушнинг сўнгги қурбони (ҳикоя). <https://ziyouz.uz/uzbek-nasri/otkir-hoshimov/otkir-hoshimov-urushning-songgi-qurboni-hikoya/>
9. Абдулҳамид Чўлпон. Кеча ва кундуз. Биринчи китоб Кеча. – Т.: Шарк, 2000. – 287 б. – Б. 273.
10. <https://ru.wikipedia.org/wiki/%D0%94%D0%B8%D1%81%D1%84%D0%B5%D0%BC%D0%B8%D0%B7%D0%BC>